



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.127/2025

Paneli Zgjedhor për Ankesa dhe Parashtresa (PZAP), i përbërë nga gjyqtarët: Skender Çoçaj - kryesues, Kymete Kicaj dhe Arsim Hamzaj - anëtarë, duke vendosur përkitazi me ankesat e subjektit politik Lëvizja Vetëvendosje (LVV), me seli në Prishtinë kundër subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore për Kuvendin e Republikës së Kosovës, që do të mbahen më datë 09 Shkurt 2025, në seancën e panelit të mbajtur me 24.01.2025, mori këtë:

V E N D I M

I. Pranohen të bazuara ankesat e subjektit politik Lëvizja Vetëvendosje (LVV), me seli në Prishtinë, Anr.127/2025 dhe Anr. 129/2025 e datës 22.01.2025, ashtu që subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjobë në lartësi prej 5,000.00 (pesëmijë) euro.

II. Detyrohet Subjekti politik Lidhja Demokratike e Kosovës (LDK), me seli në Prishtinë, që gjobën e shqiptuar si në pikën -I-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datë 22.01.2025 PZAP-i, ka pranuar ankesën Anr.127/2025 nga subjekti politik Lëvizja Vetëvendosje (LVV), me të cilën pretendon se më datë 22.01.2025, aktivistë të Lëvizjes Vetëvendosje në Istog ka identifikuar banerët/posterët e vendosura në hapësirat/rrugët publike të kandidatëve për deputetë nga radhët e LDK-së, Shkëmb Manaj dhe Lisa Rugovaj në Rrugën “Besim Kabashi”, në qendër të Gurrakoc, Komuna e Istogut.

Me datë 22.01.2025 PZAP-i, ka pranuar ankesën A.nr.129/2025, nga subjekti politik Lëvizja Vetëvendosje (LVV), paraqitur kundër subjektit politik Lidhja Demokratike e Kosovës (LDK), në të cilën pretendon se Qendra e Lëvizjes Vetëvendosje në Istog ka identifikuar posterin e

vendosur në hapësirat publike, konkretisht në rrugën “Ibrahim Rugova”, të kandidatit për deputetë nga radhët e Lidhjes Demokratike të Kosovës LDK, Rexhep Kurbogaj

Sipas parashtruesit të ankesave me këtë veprim kandidatët dhe subjekti politik LDK kanë bërë shkelje të nenit 34, paragrafi 1 nën paragrafi 1.2, të Ligjit Nr.08/L-228 për Zgjedhjet e Përgjithshme në Republikën e Kosovës-LZP, ku parashihet se *“Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose në hapësirat private pa lejen e pronareve ose shfrytëzuesve.”*

Si provë ka bashkangjitur, fotografi që dëshmon vendosjen e banerit/posterit në kundërshtim me LZP.

Më datë 23.01.2025, PZAP-i, e njoftoi subjektin politik Lidhja Demokratike e Kosovës (LDK) për ankesën e paraqitur kundër tyre, duke i dërguar kërkesë për përgjigje deri më 24.01.2025 në ora 09:00.

Në përgjigje në ankesë të paraqitur me datë 24.01.2025, subjekti politik Lidhja Demokratike e Kosovës (LDK) ka kundërshtuar ankesën e paraqitur nga subjekti Lëvizja Vetëvendosje (LVV) dhe atë për faktin se pretendimet e Lëvizjes Vetëvendosje në ankesën A.nr. 127/2025, se Subjekti Politik LDK dhe disa prej kandidatëve për deputet me rastin e vendosjes së materialeve reklamuese - posterave kanë shkelur nenin 34 paragrafi 1, nën paragrafi 1.2 të Ligjit për Zgjedhjet e Përgjithshme konsiderojmë se nuk qëndron ligjërisht. Sipas përgjigjes në ankesë theksohet se të gjitha rastet e vendosjes së këtyre materialeve – posterave kemi të bëjmë me hapësira që kanë leje nga Komuna ose janë të pronarëve privat që kanë lejuar kandidatët vendosjen e posterave në fjalë. Po ashtu në përgjigje në ankesë theksohet se për kandidatesh Shkëmb Manaj dhe Lisa Rugovaj ekzistojnë pëlqimet e përkohshme për shfrytëzimin e hapësirës publike në rr.“Besim Kabashi” në Gurrakoc, lëshuar nga Komuna e Istogut, Drejtoria për Planifikim Urban dhe Mjedis.

Po ashtu në përgjigje në ankesë theksohet se edhe për kandidatin Rexhep Kurbogaj ekziston pëlqimi i përkohshëm për shfrytëzimin e hapësirës publike, e lëshuar nga Drejtoria për Planifikim Urban dhe Mjedis në Komunën e Istogut.

Paneli, në kuptim të nenit 9 paragrafi 5, nën paragrafi 5.5 të Rregullores Nr.01/2024, për Procedurat e Parashtrimit dhe Vendosjes së Ankesave të PZAP-it, dhe nenit 84 paragrafi 1 të Ligjit Nr.05/L-031, për Procedurën e Përgjithshme Administrative, me qëllim të ekonomizimit të procedurës, ka bashkuar ankesat A.nr.127/2025, dhe A.nr.129/2025 të paraqitura me datë 22.01.2025, dhe janë trajtuar me një vendim, andaj procedimi i këtyre ankesave evidentohet nën shenjën e përbashkët A.nr.127/2025, për shkak të natyrës së njëjtë të çështjeve të parashtruara nga subjekti i njëjtë politik LVV kundër subjektit të njëjtë politik AAK, si për nga përmbajtja ashtu edhe për nga kërkesat e paraqitura të ankesave.

PZAP-i, pasi që shqyrtoj dhe vlerësoi ankesat gjeti se:

Ankesat janë të bazuara

Paneli, nga fotografitë e ofruara si provë nga parashtruesi i ankesës, të cilat gjenden në shkresat e lëndës, në mënyrë të padyshimtë ka konstatuar se kandidatet e subjektit politik LDK Shkëmb Manaj dhe Rexhep Kurbogaj, kanë shfrytëzuar jashtëligjshëm dhe në kundërshtim me dispozitat ligjore hapësirat publike konkretisht hapësirat/rrugët publike, në qendër të Gurrakoc, dhe në rrugën Ibrahim Rugova Istog, në kundërshtim me nenin 34, paragrafi 1 të Ligjit Nr.08/L-228 për Zgjedhjet e Përgjithshme në Republikën e Kosovës LZP, konkretisht neni 34, paragrafi 1 nën paragrafi 1.2 i LZP-së parasheh: *"1. Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: 1.2 vendosja e njoftimeve, pllakateve dhe posterëve, ose përndryshe, vendosja e emrave të tyre ose e sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugët publike, në shenjat publike të trafikut, brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombëtare, ose brenda ose në hapësirat private pa leje e pronarëve ose shfrytëzuesve.*

Përveç të cekurave më lartë Paneli, me rastin e vendosjes i vlerësoi edhe të gjitha pretendimet e subjektit politik Lidhja Demokratike e Kosovës, në kuadër të pretendimeve të theksuara në përgjigje në ankesë, në të cilën theksonte se kandidatet në fjalë kane pëlqimet e dhëna nga Komuna e Istogut, Paneli gjeti se përpos kandidates Lisa Rugova e cila kishte pëlqimet e përkohshme për shfrytëzimin e hapësirës publike në rr."Besim Kabashi" në Gurrakoc të lëshuar nga Komuna e Istogut, Drejtoria për Planifikim Urban dhe Mjedis, kandidati Shkëmb Manaj nuk kishin pëlqimet e përkohshme për shfrytëzimin e hapësirës publike në rr."Besim Kabashi" në Gurrakoc, dhe kandidati Rexhep Kurbogaj në rrugën Ibrahim Rugova në Istog.

Neni 120 paragrafi 1 nën paragrafi 1.3 të LZP-së thekson se në rast se PZAP përcakton se ka ndodhur shkelje e të këtij ligji ose e rregullave të KQZ-së, mundet të vendosë një gjobë ndaj një subjekti politik, në vlerë deri në pesëdhjetëmijë (50,000.00) Euro.

Përveç kësaj një veprim i tillë sanksionohet edhe me nenin 24 paragrafi 6 nën paragrafi 6.1 Rregullës Nr.01/2024, ku përcaktohet se "subjekti politik që është përfitues i fondeve për financimin e subjekteve politike përmes Buxhetit të Republikës së Kosovës dënohet me gjobë deri në njëzetmijë (20, 000.00)euro.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm, subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik LDK, ka qenë i njoftuar me obligimet dhe përgjegjësit gjatë procesit të fushatës.

Nga arsyet e theksuara me lart, e në kuptim të nenit 34 paragrafi 1 nën paragrafi 1.2, nenit 118 paragrafi 1, neni 120 paragrafi 1 nën paragrafi 1.3, të LZP-së, nenit 10 paragrafi 1, nën paragrafi 1.2 të Rregullores Nr.01/2024 për Procedurat e Parashtrimit dhe Vendosjes së Ankesave vendosi si në dispozitiv të këtij vendimi.

Paneli Zgjedhor për Ankesa dhe Parashtrësia

Anr.127/2025 më datë 24.01.2025

**Kryesues i Panelit
Skender Çoçaj**



Këshilla Juridike: Kundër këtij vendimi nuk lejohet ankesa konform nenit 118 par. 4 të LZP-së.